

# «Mobilisar è la clav dal success»

PPS grischuna: radunanza da delegads

DA GION NUTEGN STGIER / ANR

■ **Grazia a la politica reala haja la Partida populara svizra (pps) gi success tar las elecziuns naziunalas e quai er en il Grischun. Senza ina gronda campagna da placats, dentant be cun s'approximar al pievel hajan ils candidats e las candidatas persvas il suveran. La pps grischuna vul vinavant far progress sin champ chantunal, regional e local.** Trais emnas èn già passadas suenter il success da la pps tar las elecziuns naziunalas. Quellas èn lura er stadas il tema central tar la radunanza da delegads da la pps grischuna a Parpan. L'interess per quella è stà fitg grond cun esser la sala da l'hotel Stätzhorn pli che plaina. Intgins dals preschents èn lura bain stads dischillus che *Magdalena Martullo-Blocher*, la nova cussegliera naziunala, era betg preschenta cun esser en l'exteriur. Preschent era dentant cusseglier naziunal *Heinz Brand*, el che duai vegnir cusseglier federal e successur da cussegliera federala *Eveline Widmer-Schlumpf*.



Heinz Brand (san.) cun Christoph Brasser ils presidentt da la pps Curvalda.

FOTO G. N. STGIER

## In um competetent e qualifitgà

Er davart las medias è l'interess per la radunanza da delegads da la pps a Parpan stà fitg grond. Preschents eran ils schurnalists per udir dapli da la candidatura da Heinz Brand sco cusseglier federal. Durant l'entira radunanza è adina puspè vegnì discurrì da l'um competetent e qualifitgà per quest uffizi, dentant dal candidat sez han ils preschents ed ils schurnalists udì pauc.

Envers l'anr ha Heinz Brand tuttina ditg che sco candidat grischun saja betg uschè simpel da vegnir elegì sco cusseglier federal e successur d'ina cussegliera grischuna. El ha er ditg ch'èn ils proxims dis vegnan probabel enconuschents anc ulteriurs nums da candidats per il post vacant en il cussegl federal.

## El discorra tuttas «trais» linguas naziunalas

Il delegà *Livio Zanolari* ha ditg che Heinz Brand saja ina persuna fitg competenta ed el haja er buns contacts culturals e linguistics tar las regiuns talianas da noss chantun. Uschia vegnia uschia er ad esser in magistrat che s'engascha per l'italianità. *Roland Grigioni*, il manader da la

cumissiuon electorala ha ditg che cun Heinz Brand preschenta la pps grischuna in candidat che discorra tuttas «trais» linguas naziunalas e quai saja bain in bonus per daventar cusseglier federal. Davart da la direcziun da la pps grischuna è vegnì confermà envers l'anr la nominaziun da Heinz Brand sco candidat per il cussegl federal. Ils 12 da november 2015

vegna la pps da noss chantun a communitgar uffizialmain la candidatura per quest uffizi.

## «SVP bi de Lüt»

Quai saja er stà il recept da success tar las elecziuns naziunalas avant trais emnas en il Grischun, ha ditg Heinz Brand. Ils 20 candidats e las candidats da la pps sajan ids or en las regiuns per vegnir pli datiers al pievel ed uschia far conuschientscha cun ils quitads, problems e giavischs da tuts. Ultra da quaj hajan ils commembers da la pps mobilisà en l'entir chantun electurs è persvas quels da be eleger candidats e candidats da la pps. «Mobilisar è la clav dal success e jau sun losch da la lavur exemplarica da tuts noss commembers», ha ditg Heinz Brand. La pps fetschia ina politica factica e quai haja il pievel grischun remunerà. Suenter il grond success tar las elecziuns naziunalas saja ussa betg da sa revegnir, mabain da daventar anc pli activ, ha accentuà Heinz Brand, il president da la pps grischuna. El ha ditg ch'èn l'avegnir duai la pps grischuna vegnir pli activa, saja quai sin champ chantunal, regional e local. Era l'elecziun da proporz per l'elecziun dal parlament chantunal saja segir er danovamain in tema.

Ils delgads e las delegadas han er decidì las parolas per ils proxims projects da votaziun. La pps grischun vul prender posiziun davart l'iniziativa per ina buna scola grischuna ed ils preschents han incumbensà la direcziun d'elavurar ina posiziun. L'iniziativa federala che vul scumandar speculaziuns cun mangiativas refusa la pps grischuna.